

DISSERTATIO THEOLOGICA,
SISTENS
*CONSPEC TUM SCIENTIÆ
PASTORALIS,*
IN USUM SEMINARII THEOLOGICI.

CUJUS PARTEM QUINTAM,
APPROBANTE MAX. VENER. FAC. THEOL. ABOÜNSI,

MODERANTE
JACOBO BONSDORFF,
S. S. Theol. Profess. & Licent.

publico examini subjicit

ABRAHAMUS REILIN,
V. D. Minister.

In Atrio Cancellariae d. XVII Jun. MDCCCIX.
h. a. m. f.

ABOÈ, Typis Frenckellianis,



Tuis partibus debet esse ad liquidum perducta, antequam exordium præfigatur, ne accidat, quod saepius accidere solet, ut una eademque res in Exordio & Tractatione proponatur. A cognitis & axiomaticis ad incognitas & problematicas res probandas descendere debet, quicunque rite instituere ac persuadere voluerit. Tractatio autem essentialia omnia dogmata, præcepta, argumenta, undique conflata, exemplaque continet eo ordine, quo quæcunque res, & auditorum ratio postulat. Unde tamen minime sequitur, eandem methodum semper observari debere; Arbitraria enim est & liberrima, nec non pro Oratoris ingenio & immenso rerum apparatu, quin etiam textus varietate, instituenda. Sic v. c. modestiam Christianam expositurus Orator, eandem, aut generalius aut specialius, respectu habito sive ad Deum, sive nosmetippos, sive alios, illustrare poterit; immortalitatem animorum, aut quatenus vera & necessaria, aut utilis & ad religionem s. moralitatem omnem accommodata, aut quia omnium hominum sensui familiaris sit, aut Christo in primis doctore stabilita, proponet; e. s. p. Unde quoque id consilium junioribus præconibus damus, ut plures interdum dispositiones eodem in tex- tu simul componant, quas per partes omnes elaborent, quo sic eligendi quedam ipsis suppeditetur occasio.

§. 4. Dubitatum autem ac disceptatum saepius fuit, utrum dispositio semper calamo excipi debeat, an sola meditatione absolvi una cum oratione universa interdum possit. Quæritur vero tum non de extemporaneis & incoctis concionibus, in quibus nulla idonea series neque justus rerum delectus, sed fluxus tantum verbo: um & phrasium Bibliarum obvenit; quod quidem genus concionandi longe pessimum est; sed quæritur, utrum ingenio memoriaque quis ita valere poterit, ut quæ rite ac ordine præmeditatus fuerit, bene quoque & ad peruvadendum apte, vivide ac efficaciter poslit eloqui. Neque absolute negandum est, nonnulla quamquam rariora & longiori usu exulta dari communicandi dona, quibus suffulti Oratores Sacri verba facere ex tempore, ut dicuntur, possint; interim tamen caveant sibi, ne ultra necessitatis casum aut modum benefica hac suæ naturæ utantur facilitate, neque memoriæ suæ tantum tribuant, ut cogitata sua nunquam conjiciant in chartam. Præterea cuiusque docebit experientia, longe majori cum attentione, subtilitate & ubertate proponi res, prævia elaboratas dispositione, immo melius hoc pacto adjuvari ac procedere meditationem, quam si præscripto deſtituantur tenore. Quod si in brevioribus exhortationibus & analyticis concionibus, quæ textum biblicum strictius sequuntur, locum

cum obtainere sola præmeditatio possit, in longioribus tamen & instructioribus orationibus minime valebit. Meminerit quippe Orator Sacer, quot rerum momenta & argumenta, quot velut diverticula, quot exceptiones hominum præjudiciis occæcatorum, quotque modos ad affectus ciendos moresque emendandos excogitare debeat, ut victoriam velut reportare oratione sua valeat. Negligentius qui in hoc suo officio versatus fuerit, neutquam consilio satisfecisse dicendus.

§. 5. Quæri etiam solet, num & quantum libri Dispositionum ab aliis prescripti, consulendi fiat. Atque nemo usum eorum tantisper denegabit, si intra debitos suos teneatur adjutorium hocce cancellos, nec ad ignaviam alendam extendatur. Quis non amicorum consilia in quavis re fruouosa esse ac audienda pronuntiabit, quanto magis in saluberrimo religionis negotio. Hic enim est usus bonorum exemplorum, ut 1) varietatem & copiam dicendi e quovis textu haurire posint tirones & minus exercitati; 2) ingenium suum & judicium in inventiendis & exponendis argumentis acuant; quin etiam 3) a vitiis cito obrepentibus ablinere aduertant. Male tamen his utuntur sublidiis, qui totos se iis tradunt ducibus, atque a Scripturæ S. lectione cæterisque doct in æ Christianæ solidioribus adminiculis se avocari patiuntur.

§. 6. Ne vero nuda præcepta proposuisse videantur, exemplum dispositionis apponere juvabit, ex. gr. Thesma:

Fundamentum, quo pax conscientiae vera ntitur.

Parasceve. Job. 16: 19. *Testis meus in coelis est.* — Post tot disceptationes cum suis amicis male tenacibus ac suspiciois; post tot ærumnas, quas perpesus erat Jobus, cultor Dei integerrimus, Divinum appellat forum —; Optimus judex ac vindicta est Deus — infallibilis, & falli nescius. Contra vero, hominum judicia sunt fallacia, partium vario studio & mutationi obnoxia — quin & iniqua, inimica. Integer vita sit, qui testem ac vindicem Deum provocabit, & quamquam nullus mortalium iniuritatis sit expers, sincerus tamen, qui omnibus nitiuit viribus in veritate tuenda, Deo placet, gratus ipsi est & conscientiam tranquillam servat.

Traditio. I: a Pars. Pax conscientiae, qualis. — Quid est conscientia? quid pax? cur animus dicitur in pace secum ipso esse? Duplici ex parte sentit se animus Christiani hominis pacatum:

1) quatenus liber est a *reatu peccati* i.e. mortibus conscientiae — & metu poenarum hujus & futuræ vitae. Quod contingit a) sub sensu poenitentiae, sine quo peccata quævis non posunt non mentem reprobrare. Hand

con-

conditionem Christus ipse sc̄pius proposuit.
 β) per veram fidem in Christum, quæ altera conditio est condonationis.

2) Quatenus homo liberatus est a *dominio peccati*; summa enim tranquillitas & lœtitia oritur α) ex *sincero veritatis studio*. Quemadmodum errores mentem reddunt turbulentam — præjudicia itidem vexant, ita contra, veritas & veri amor perpetuam præbet lœtandi materiem. β) *constanti sanctitatis studio*. Animo pacato esse non potest, qui aut peccatis voluntariis indulget, aut affectibus immoderatis, aut sensualibus voluptatibus se committit. Pius quivis & virtutis Christiane cultor infinitam habet delectationem; approbat omnia ejus cogitata — desideria — facta — non modo conscientia ejus, sed sublimior testis, Deus.

Pars II:da. Fundamentum, cui pax conscientiae innititur, s. causa, cur tranquillitatem animi assequi potest verus Christianus. Hæc vero causa non potest esse mere humana, v. c. laus, approbatio, sive propria (quæ tæpius e superbia enata), sive ex aliis profecta — quia fallaces sunt homines; sed omnis approbatio nostri ipsius debet cum sensu dependentiae a Deo, & amore ejus conjungi. Qui sentiunt se a Deo amari, veniam peccati & infirmitatis nancisci, approbari, ad felicitatem destinatos esse ac per omnem vitam perfici — ; ii demum pacem

colunt secum ipsis. Sed hic Divinus amor dupli ci respectu considerandus.

1) reatus peccatorum pristinorum non evanescit, nisi recognites α) immensam Dei misericordiam, β) sublime mortis Iesu consilium, Divinæ misericordiae sigillum, γ) veritatem promisorum Dei — & Christi.

2) Fidei & pietatis approbatio a Dei immodo favore & paterna benignitate venit. Verissime perlvasi erimus, Deum nos approbare & amare utpote fideles, pios. En summum beneplacitum Dei, Christo consummatisimo hominum salutisque Restitutori assignatum! Hem, quantum distamus! sed imitemur eum, ut conscientia nostra tranquilletur.

Usus. Fideles erigendi ac confortandi; Impiis vero sub dominio peccati servientibus nulla pax vera, nisi recipiscant & Christo semet addicant, eique confidant.

§. 7. Disponendi artem in textibus receptis sua quemque docebit prudentia, sua excitabit libertas. Verum haud inutile erit, schemata Auctorum diversorum perlustrare, v. c. TELLER, BEIER, RAU, STURM, BRACKE, MÖLLER, ÖDMANN e. q. rel.; sed tantum consulendi, non exscribendi causa. Admonendi autem sunt concionatores: 1) nemis e longinquo petant materiem, eamque disponant sine textus habita ratione; 2) ne syllematicum nemis premant ordinem, quamquam eundem ipsis consulant, sed popularem,

fa-

facilem, simplicem sequantur; 3) ne festis diebus alienum quoddam proponant argumentum, atque ab ipsius festivitatis scopo aberrent, si vel maxime eundem quotannis memorabilem celebrarent eventum; 4) in disponendis concionibus semper rationem habent auditorum suorum, quorum cogitandi modo, progressibus aut defectibus accommodanda est oratio, ut fructuosa evadat.

Festi dies Christianorum majores uberrimam præbent orationibus Sacris materiem, quam disponere haud difficile erit. In *Festis Nativitatis Christi* esentialia hæc ultro se offerunt argumenta: Adventus J. C. gloriösus, a Prophetis prædictus, mundo salutaris, expectatus; Divina gloria, maiestas, benignitas nascente Christo manifestata; Magnitudo & sapientia consiliorum Dei circa adventum J. C.; Tristis humani generis status circa tempus nativ. Christi; Depravatio & miseria humana non nisi per Christum tollenda; Mysterium pietatis magnum, Deum humana natura apparuisse; Salus humana nunquam intermoritura, quia Christus apparet; Hymnus Angelorum sublimis; Quacum animi indole celebrare convenit hunc diem festivum — e. f. p.

Festum novi anni dicatum sit memoriam Divinorum beneficiorum, Spei futuri, acquiescentiae in Deo, mirabili Dei providentiae in humanis dirigendis fatis, vitæ humanæ in-

con-

constantia, temporis rite adhibendi methodo, summis Christi beneficiis ex nomine ejus dignoscendis, cæt. conf. NIEMEYER *Handb.* Festi dies *Passionis*. Iesu continuam subministrabunt idem Divini consilii in morte Iesu Christi apparentis, heroicæ Divinæque Iesu, mortem opotentis, constantiae, patientiae, nobilis amoris studii, stupenda vero hujus mortis, unacum mirabilibus ejus consequentiis; ideam expiationis vicariæ, remissionis peccatorum morte Christi paratae ac confirmatae, Divinæ justitiae atque misericordiae hoc mortis obsignatæ sigillo, e. s. p. Tota doctrina & historia de Christo amplam præbet his festis celebrandis ansam. Vanum esset a primario mortis expiatoriæ resilire consilio, aut martyrium Christi nude laudare. Meminerint concionatores: 1) Crucem ac mortem Servatoris non esse vilipendendam, nam arcis instar & refugii erit Christianis sub omni peccatorum dominio poenarumque metu graviter luctantibus; 2) Mysticis & hyperphysicis haerendum non esse umbraculis, qualia sunt themata in EKMAN *Florileg. Arbor vitæ in Golgatha, Sabbathum redemtionis, Peregrinatio ad sepulcr. Iesu, mystrium crucis*; 3) Sacrificalem theoriam Vetus Test. a Paulo saepius accommodatam, non nimis extendendam esse, sed ad verum suum usum referendam; 4) Characteres personarum in historia passionis J. Chr. commemorata-

rum

rum prætermittendos non esse, quia ab iis nullum illustratur theoria mortis Christi. Exempla concionum specialia dēdere: RAMBACH, LESS, STURM, EWALD, (*Ecclen, Tod und Auferst. Jes.*) G. J. PAULI, TRESCHO, TITTMAN.

Pascuale Festum illustrabit sublimis historia resurrectionis Jesu, ejusque certitudo, gravitas, auctoritas, influxus in omnem doctrinam christianam stabiliendam, maxime vero ad immortalitatis, æternæ vitæ & expiationis Jesu commonisrandam veritatem. Hinc spes beatos quoslibet & amicos iterum vivendi, spes cum Christo versandi, ejusque fruendi familiaritate alitur. Abstinendum modo a tropicis declamationibus de victoria I. Chr. super mortem f. Diabolum —; nec nisi raro allegorica comparatio resurrectionis Christi & Spiritualis a peccato resurrectionis instituatur.

Pentecostes Feste: admiranda dona primis Christianis impertita; Spiritus Divini efficientia, imperscrutabilis quidem sed vera, moralis, mediata, ordinaria; Gratiae Divinae, f. gratiæ operationis certitudo, influxus & habitus ad animum hominis ac libertatem; sensus præsentiae Divinae, unionis f. familiaritatis; Imperium Dei morale —; cautelæ circa actus gratiæ, & statum gratiæ; vera criteria Christianismi, & assistentiæ spiritualis; Verbi Divini vis, e. q. rel. sunt

sunt dogmata, pertinent ad hujus Diei festivitatem, & commode posunt cum argumento Evangelici textus conjungi.

Ad reliquos minores festos dies, utpote Mariæ, Jobannis, Michaëlis, Sandorum, Martyrum, Stephani, quod attinet, habent quidem nonnulli in le quoddam memorabile, quod ex historia evangelica exponi debet; alii autem e. c. Michaëlis, Sanctorum festum, ex Catholicismo relidui, parum iugis trifri sunt; Hærendum igitur est in locis communibus, prout textus Evangelicus svadeat.

Cæteri omnes Dominicales dies & textus dogmatico-moralem tradunt materiem, quam scite & varie disponere debent oratores S. ne eandem velut inflantes tibiam, idemque modulantes carmen, tredium excitent auditoribus. Auctores probatisimi, ad Historiam Homilet. citati consulantur.

§. 8. Conciones vero *Casuales*, argumenta & dispositionis methodum, quæque sibi propriam, minime tamen ab Evangelica doctrina universa abhorrentem, postulant. Inepte enim agunt, qui ad politicas quasvis, juridicas, medicas & œconomicas descendunt tractationes, heterogeneas plane & Religioso consilio parum convenientes. Sciant concionatores loci ac temporis rationem habere, atque ad usum auditorum suas accommodare orationes.

Pri-

Prima classis casualium concionum est *Solennium*, i. Publicarum illa. *Poenitentiales* sic dicti Festi, quater quotannis celebrari soliti, quadruplici vulgo inclaretur confilio, laudes scilicet Divinas infinitas commemorandi, gratiarum actiones pro summis Dei beneficiis temporalibus habendi, preces Deo ex animo fundendi, & ad veram pœnitentiam agendam excitandi. Unde facile intelligitur, materiem his diebus pertractandam patere uberrimam, prout insuper textus Biblicalis, quem summus Imperans definire solet, ansam præbuerit optimam. Sollicitus vero fit orator in præcavendis vulgi, nec levioribus neque rarioribus, erroribus, quasi jejunia, castigationes aliaque externa incommoda, sive sint publica sive privata, Deo exsolvere possint pœnam peccatis promeritam, aut eandem avertere. Quum enim faciles & proni sint homines rudiores ad opera quævis operata suscipienda, ad superstitionem, hypocrisim, aliaque id genus temere amplectenda, sedulo omnino commonendi ac instituendi sunt: de interna mentis emendatione, utpote vera pœnitentiae natura; de dolore mentis ac tristitiae sensu, cum odio peccati conjungendo; de vanitate hominum, externam solam præferentium pietatis speciem; de impio atque in Deum consumelioso errore, sceleris voluntaria quibuslibet devotionis modis expiare jubente e. s. p. In publicis quo-

quoque plagis ac pœnis dijudicandis, quin circumspœde agere debet Orator Sacer, nullum est dubium. *Reformationis* festo, Jubileis consecrato concionibus, omnem attentionem vertat in cœtus nostri Christiani, Evangelico-Lutherani, felicissima fata. Grave adest argumentum: in Providentia Divina, circa religionem nostram tuendam conspicua, puritate doctrinæ nostræ per Reformatores conservata, fortunatis Religionis fatis studiorum doctorum promotis, incrementis regni Divini ac litterarum Sacrarum, ad morum Christianorum perfectionem tendentibus, cæt. Quocirca observandum etiam est, comode in his concionibus mentionem fieri LUTHERI, Augustanæ Confessionis, belli Smalcaldici, & Romanæ aulæ pios confessores persequendi studiorum; Hæc tamen omnia historica momenta accidentalia sunt, ultra plebis captum non extendenda.

Festum *Coronationis Regiae, Baptismatis* aëtus, *Confirmationis*, & qui sunt cæteri ritus Sacri, ad Imperantem pertinentes, oratione quadam e suggestu sacro celebrare solent. Quam ergo quovis in casu feligere materiem, & quomodo eandem rite & ad locum accommodate disponere debeant Ora- tores, non utique omnibus in promptu, quamquam facile sit ad intelligendum, quinam loci communes huc pertineant. Has tantum addimus cautiones: 1) ne serviliter exterruunt splen-

splendorem commemorent, aut adulatorio modo regalia symbola aut quævis alia, Evangelicam doctrinam non spectantia, prædicent, 2) ne jura majestatica immediate, sed mediate a Deo summo, Imperanti civili tradita proponant; 3) ut decentiam omnem verborum ad libellum Religionis & Divini Numinis sensum imprimendum referant, quod sit, si publicam salutem cum religionis cura sollicite jungendam docuerint, Christianismum utpote civitatis optimum fulcrum, jura & officia Imperantis ac subditorum mutua, vim religionis ad rite administrandum Imperantis negotium, sceptrigerum pium Dei cultorem, e. s. p. adumbraverint. Cæteri actus solemnes regii, ad sua referuntur themata.

Conciones *Comitiales* ad subditorum ac civium matuam concordiam, pacem ac amorem in Patriam fassilaminandum componantur necesse est. Idem quoque ad partem valebit de iis, quæ *Pacem* publicam sive belligerendi duram necessitatem pro scopo habent. In bello concordes, fortes ac constantes, in pace tranquillos, & grato in Deum animo affectos esse, evadet ipsa rei natura & ratio.

*Secunda Clas*is Casualium orationum complectitur speciales *introductiones*, sive Ecclesiæ doctorum in munere suo, sive confirmandorum in baptismali actu, sive baptizandorum & recens ad Christiana sacra con-

ver.

verorum, sive Conjugum desponsatorum, si-
ve Templorum aliarumque rerum consecra-
darum Huc quoque referri posunt oratio-
nes *Visitatoriæ*, & *Valedictoriæ*. Quid in
quovis casu tractare, & quomodo materiem
suam disponere debeat orator, non est quod
pluribus persequamur, quum loci communes
satis sint in hoc universo genere familiares.
Neque semper necesse est judicamus, textum
quendam biblicum eligere atque exponere,
nisi fortassis loci festivitas & auditorum ra-
tio id exigat, e. c. in confirmatoriis & vi-
sitatoriis concionibus; siquidem melius aptius
que agitur, dum gravem quandam senten-
tiā ex Apostolicis scriptis mutuantur ora-
tores, quam si suam tantum nude proponant
admonitionem. Conf. Ps. 19: 7—12. 84: 7.
94: 12. Jes. 48: 17. Eph. 4: 11. Col. 2:
7. 2 Cor. 5: 17—21. Joh. 6: 45. Absit
autem in orationibus inauguralibus omnis
propria laus, commendatio, auctoritas, insol-
lentia, adulatio, simulatio, immo quoque af-
flectata humilitas. In Visitatoriis & Valedi-
ctoriis absit offensio, invidia, & ostentandi
sive taxandi conquerendive pruritus; que
omnia vitia graviter officiunt consilio oratio-
nis intento. Sublidia porro qui quæsierit,
varia jam in PORSTS *Homiletica in exem-*
plis inveniet, præprimis vero a deo WAL-
DAUS & SCHOLERS *Repertorium guter Ca-*
fusalreden, STURMS *Confirmations Reden*,
HUF-

HUENAGEL *Liturgische Blätter*, HACKER
Materialien zu klein Amtsreden. Plura da-
bit NIEMEYER *Prediger Bibliotek*.

Tertiam constituumus concionum casu-
lium classem, quæ *Exhortative* sunt, in
fensu *Judicium religioso* excitando occupata;
siquidem haud male est a majoribus &
magistratu Politico statutum, ut *Judices* quili-
bet & rerum publicarum administratores, de
sanctissimo suo & haud sine Religionis sensu
exsequendo officio præmoneantur. Cito nam-
que non minus in plebe, quam politiori ho-
minum circulo, sublimis Numinis sensus,
conscientiæ dictamen, ac vera omnis virtus
evanesceret, nisi iterum iterumque recurre-
ret mentibusque omnium instillaretur excel-
lentissima doctrina Christi, vim legibus ad-
dens civilibus. Aptæ scilicet tum erit di-
cendi occasio; de vinculo legis & religionis
mutuo, de externa legalitate ad pietatem
conformanda, necessitate legis ad promoven-
da Christianorum jura, de justitia sancte co-
lenda, conscientiæque dictamine & Divino
judicio, sancte observando; porro de civili
prudentia in præcavendis criminibus, nec
non in præmuniendis otiosis litibus, æquita-
teque in communi vita tuenda, e. s. p. Conf.
textus biblicos: Eccl. 8: 11. 11: 9. Math.
7: 2. 2 Chron. 19: 6. Jes. 16: 3. Ps. 82:
1. Rom. 13: 2—5. Jer. 22: 3. cet. Cautio-
nes vero antea præscriptas observet concio-
na-

nator, adeatque Scriptores laudatos a SCHÜLER, v. c. BEYER, HAHNZOG *Predigten* al.

Quarta Claslis casualium concionum, circa *absolutionem* & Sacrae cœnæ usum, tam ad tñlenchum moralem quam consolacionem, versatur. Vulgatisimi hi sunt casus, summa tamen cum fidelitate, prudentia & æquitate observandi; quare etiam, cum non opus judicemus, argumenta quædam aut theœma uberiora sistere concionatoribus, monita saltim gravissima adferre placet: 1) Duplœm semper habeant rationem auditorum, vere pœnitentium fideliumque, & eorum, qui externe tantum Christi doctrinam profitentes vitam suam & animum ad ejus præscriptum non componunt; quorum *Illi* confirmandi, *bi* vero ad chilianeœ modestiæ tenorem castigandi; 2) In reprehensionibus abit omnis malignitas, insolentia & timiditas; 3) Notorie impii non sunt admittendi, antequam instituti & admoniti fuerint, fructusque veræ pœnitentiæ dederint; 4) In ipsa exhortatione servetur ordo ac dispositio, prout textus eandem postulaverit, quanquam brevior ea sit & simplicior; conf. præter cæteros LACHMANS *Samml.* v. *Amis Red.* zur vorbereit. d. beil. *Abendmabs*, SUNDII *Skriftetul.* al. Peccant ergo qui nec præmeditati quidquam sunt in hoc genere, neque juto utuntur ordine, iusta que applicatione. 5) Quia absolutionis formula recepta hanc sine scandalõ retinet posse.

posit, præstat Paulum monitorem sequi in adhortatione 2 Cor. 5: 19—21. Extraordinaria enim facultas remittendi peccata nemini mortalium competit, sed soli Deo est reservata. Quæcumque vero dederimus monita, consilia, solamina, ea omnia Christi ex præcepto, ejusque in honorem, dabimus.

Quinta demum sit classis, *funebrium s. sepulcralium* concionum, quarum fertilissimam nostratibus arrisiste videmus segetem. Non est sermo de Laudatione fanebri oratoria, quæ summam exposcit artem, sed de popularibus exhortationibus, ad mortuorum sepulturam institutis. Negandum haudquam est, æquitatem ac dignitatem Christiani nominis id exigere, ut defunctos pios Dei cultores grata celebremus memoria, atque solamina exhibeamus superstitionibus eorum amicis consanguineisque; quo suo duplice consilio utilissimæ evadere possunt ejusmodi conciones; Interim vero, quam ad ambitionem ac vanitatem sufflaminandam, quia etiam obscurissimorum hominum laudes celebrandas temere saepius extendantur, modum & terminum justum ut præscribant sibi in hoc genere oratores, invademus; multo minus lucri cuiusdam causa, occœcatæ plebis in hac parte vanitatem alete convenit. Quod si vero hunc morem receptum restringere aut quadantenus antiquare non posint Ecclesiæ doctores, meminerint saltim bonum

inde elicere fructum. Parci itaque sunt in laudatione, nisi mortui cujusdam tanta fuerit anteaetæ vitæ laus, ut merito exempli loco proponi debeat; animum vero auditorum in primis ad religiosas veritates de itata post mortem futuro, immortalitate, spe beatioris vitæ atque sollicita ad eam amplectendum cura advertant.

Latisime patet hic campus, nec deesse poterit concionatori salutifera materies in omnium usum tractanda. Mortis necessitatem omnes manere, omnibus opus esse pia venturi ævi consideratione, præparatione ac consolatione, quis nescit? Ambiguam fallacemve spem felicitatis multis inesse, nec posse quemquam tranquille mori, qui bene non vixerit; bene vivere neminem posse, nisi vere fidelem; vitam hancce caducam quasi vestibulum esse intermorituræ nunquam vitæ; mortem ipsam fidelibus viam pandere summæ felicitati; cum Christo esse atque ejus frui familiaritate, id demum a veris Christianis exspectari posse; omnemque acetitatem mortis hoc saluberrimo medicamine deliniri; haec & alia bene multa sunt in concionibus commenmoranda, promissionibusque ipsius Christi & Apostolorum munienda, c. c. Joh. 11: 25. 5: 26. 14: 6. cæt.

Exempla talium concionum habebunt juniores in: *Trostschriften zur aufricht für Leidende*; — ROSE Kanzelvorträge zum gebrauche

*braucbe der Leseleichen, TROSCHELIS Unter-
richt u. Trost bey dem absterb. nāb. Anver-
wandten, WAGENIČ, al.*

Conciones autem in solenni capituis exsequendo supplicio habendas, ut prætermittant penitus concionatores, prudentia svadere videtur publica. Cf. STURN Ueber die gewohnheit Missethäter durch Predigten zur binrichtung begleiten. Sio vero prorsus abrogari non possint, circumspecte & gravioriter de consilio pœnarum civilium verba faciant, in illud in primis intenti, ut absterrentur alii ab eodem, cujus reum se fecit mortis supplicio plectendus, horrendo facinore.

CAP. VII.

De Exordio.

§. 1. Nullo modo ad essentiam Orationis pertinere *Exordium* s. paralceuen, rite dum observatum est. Primorum Seculorum doctores usque ad IV. Sec. inter Græcos & VIII. Sec. inter Latinos, nihil tale adhibuerunt, quia scilicet analyticæ methodo in Concionibus suis utebantur; immo Recentiorum multi v. c. ZOLLIKOFER hac parte supercedent, sine ullo Religionis vel auditio-

rum detimento. Ad imitationem vero prōfane eloquentiæ Græcorum, exordia institui cepta sunt, neque absurdō penitus consilio. Quum ergo hic invaluerit per se indifferens mos, retineatur tantisper, licet non eadem ferme de causa, qua antiqui Oratores eundem necessarium duxerunt. Duplex scilicet ipsiſ erat consilium, ut sive attentionem auditorum promtumve favendi studium excitarent, sive rerum causarumve omnium complexum, de quibus dicendum eset, enarrarent. Religio vero christiana nostris in concionibus instituenda, non ejus est indolis, ut multa oratoris indigeat commendatione, quia cognita plerisque est ac familiaris, & insitam velut habeat persuadendi vim ipsa. Cæterum facer textus prælegendus fatis ad fert attentionis.

§. 2. Negari tamen non potest, exordia concionum sacrarum quodammodo melius conferre: 1) ad attentionem auditorum ciendam, sicuti bene & apposite construantur; quo sensu vocantur *excitativa*, erweckungs Eingänge, apud MOSHEIM. Absit quidem omnis vanitas popularem, in veritatibus longe salutaribus & emendatione hominum promovenda, captandi auram. Etenim sensualia bona non sunt commendanda, sed invictissima robora sensuum fraudibus objicienda. Qui enim quicquid palato voluptuorum arrideat adferre studet, fucum faciens verbo- rum,

rum, nāe is sublime Evangelici muneris subvertere velle videatur fundamentum. Ut vero cœlestis omnis veritas summa attentione digna est, ita meliorem habebit adiutia apud auditores, si vis ejus atque præstantia, pariter ac dignitas & harmonia, cum morali nostra natura e. s. p. adumbretur. 2) Ad tractationem ipsam præparandam, loci quidam communes & quasi axiomata præcedere commode posunt, quemadmodum in philosophicis ac mathematicis demonstrationibus multa præstruuntur antea cognita. Cujus generis Exordia sunt *doctrinalia*. Sic e. c. in definienda pœnitentiae, fidei, sanctitatis natura, optimum est præmittere ideam hominis peccatoris, moralis naturæ una cum ejus defectibus e. s. p. Axiomaticum enim est, hominem non posse ad veram emendationem pertingere, nisi sui status sit conscius. 3) Posunt quoque exordia esse *elenctica*, ad præcavendos nonnullos errores, qui universæ rei tractandæ forte obescent, nisi animis auditorum prius eriperentur. Expiationis v. c. Jesu vicariæ necessitatem probaturus Orator, adimat auditoribus pravum de ira Divina, non nisi sangvine Jesu, filii Dei, placanda conceptum; adimat præjudicium vulgi, quasi nulla pœna maneret homines impios, quia Christus substantialiter ac realiter passus sit Deoque pro omnium peccatis satisficerit. Error quoque eorum meretur per-

strin-

stringi, qui nulla opus esse putant redemtione, quia amor Dei infinitus sit, e. s. p. 4) Exordia hermeneutica & analytica ad explicandum textum, sive definitum iure arbitriatum, haud male adhibentur, quia hoc modo lectio scripturae Sacrae adjuvatur; Sciant tantum concionatores, dictum ejusmodi Biblicum exordii loco eligere, quod cum materia orationis cognatum sit; discantque abstinere ab eruditis quibuslibet ac exegeticis commentationibus. Qui cœcum quendam in Sacro libro prælegendo & exponendo, præfaminis loco olim sequebantur ordinem, multos sibi minime habuere consentientes, 5) Exordia demum *narratoria* suo haud destinuntur usu, historico præprimis in textu.

§. 3 Generales porro regulæ in exordiis observandæ sunt: 1) Ne ab iisdem incipiat concionator suam elaborare orationem, sed totam absolvat tractationem, ante quam ingressum quendam meditetur, perinde ac in æde parapda, introitus sive vestibulum non primas postulat curas sed postremas, quamquam nemo nisi per vestibulum in ædes penetraverit intimas. Quodli tamen bene inventa atque disposita fuerit materies dicendorum, nihil impedit, quominus exordium primas sibi vindicet partes, maxime in iis concionibus, ubi attentio auditorum excitanda est, aut diei ipsius festivitas affectus oratoris commovere & ad sacrum stuporem ra-

pe-

pere videatur. 2) Materia exordii minime identica sit, sed cum ipsa tractatione, aut ut causa cum effectu, simile cum simili s. contrario, majus cum minore, aut ut genus & species, species & individuum, objectum cum suis subjectis exemplisve, e. s. p. conjugatur oportet. Aliter si fiat, vix intelligunt auditores nexus rerum, nec nisi tandem ex tautologia capient. 3) Breve sit exordium, ne retardetur aut prægravetur attentio auditorum. Qui longas præmittunt prælationes, idem faciunt ac ii, qui ædificiis suis spatiola addunt vestibula. Perpetram etiam agunt, qui HULSEMANNUM alescuti, duplice, generali nimisrum & speciali, utuntur exordio sive præfamine. 4) Ut vero bene elaboratum sit præfamen & materia orationis aptum, sive simplici stilo in didactiis, sive sublimiori in magnificis Dei atque Christi beneficiis celebrandis compostum, rei Iuadet natura. Ubi tamen mox ab initio orationis in affectus erumpere utile sit, e. c. in festo nativitatis, mortis & resurrectionis Christi; sciamus, hos ipsos affectus prudenti cum moderatione per integrum sustinere & alere orationem. Vana autem declamatio cum exilitate sermonis conjuncta, puerilis est lusus, in quem quadrigat HORATII: *partariunt montes.* 5) Utile interdum erit, per brevem summam & uno quasi obtutu res gravissimas in exordio enarrare, quæ in

in concione uberius explicabuntur, aut quārum non nisi unam elegeris tractandam. 6) Loco exordii poterint quoque versus quidam ex hymnorū libro, sive preces & suspiria præmitti.

CAP. VIII.

De Propositione & Partitione.

§. 1. Post Exordium Veteres Oratores adhibuerunt *Narrationem*, quæ quidem in forensibus causis necessaria erat; qua vero in concionibus hodiernis vix opus habemus, nisi in Analyticis illis, sive historicis, quibus textus Sacer anlām suppeditaverit; e. c. ad festum nativit. passionis ac Resurrectionis Christi e. l. p. Textus quippe ex harmonia Evangelistarum dilucidandus est, ut rite docet BÆLTER. Tantum tamen abest, ut semper & ubique analyticam methodum sequamur in historicis textibus, ut potius certam plerumque eligamus dicendi materiem; unde sequitur, syntheticas conciones rarius expositionem historicam exposcere. Expedita igitur prælectione Sacri textus ad tractationem ipsam accedens Orator, omnium primo brevem sententiam & summam dicendorum, h. e. *tbema* s. *propositionem*, auditoribus suis

scis sistat. Ut enim auditores uno velut intuitu veritatum complexum cernere & ad veram animi sui persuationem referre possint, brevis proponi debet sententia, memoriam quippe iterum iterumque versatura. Simplex propositio nulla quidem eget divisione; sed ubi diversa contineat momenta, invicem connexa, nihil obstat quo minus in partes suas dispelcatur. Sic v. c. argumentum de acquiescentia in Deo, s. grato in Deum animo, simplex est & adaequatum; sententia vero de fundamento, salute, & motivis Christianæ virtutis, duas habet partes, virtutem scilicet Christianam & ejus fundamentum cæt. concernentes. Cave tamen credas, semper adstringi oratorem ad eandem formam. Ut enim subiecta quævis personalia & realia multa habent sibi adjuncta attributa s. prædicata, atque tara ex natura sua quam eauslis, effectibus, veritate, necessitate cæt. posunt demonstrari, ita liberum est oratori Sacro, eligere quod loco ac tempori convenientem videatur; immo quoque a libertate ejus pendet, utrum unicum aut plura themata, mutuo concatenata, siftere voluerit: e. c. Libertas homini competit per naturam, sed subest Divinæ gratiæ s. Divini Spiritus moderamini.

§. 2. *Propositio sit 1) esentialis, digna;*
omnis curiosa quæstio de operibus Dei sex
diebus peractis, angelorum ministerio, fine
muni-

mundi e. s. p. ut quoque minus subtilis dissertatione de spiritualitate Dei, incarnatione, processione Spiritus S. e. s. p. abeat e. populari oratione. Merito texantur themata apud EKMAN in *Florilegio*: Ex aqua vinum, ultima mesis, tela Satanæ ignita, lata via ad oculum, Siclus sanctuarii, gemitus columbit, regulæ mensales, e. s. p. Neque commendari possunt recentiorum nonnullorum themata, ex genere politico, diaetetico al. perperam defumta. 2) *Evidens* quoque sit & propriis enunciata verbis Propositio, Absolum fuit artificium Concionatorum ex Sec. XVII. & XVIII. inter Germanos aliosque, allegoricas, mysticas, figuratas concoquendi propositiones, & themata iehematica, qualia MOSHEIM jure vituperat: *der vor der Sonnendes Glaubens aufgebende Thau der Busse* (de Johanne); *den von der Sonne der Gerechtigkeit berleuchtender Morgenstern*; — *Christus als den besten Pfeiffer*. Meslein ejusdem generis largam praebet EKMAN in *Florileg. v. c.* dona Christi regalia, Sol mane rubicundus, Horologium Clarii, Navigatio Spiritualis ad portum pulchrum vitæ æternæ, Zizania in tritico, bellum Sacrum, Rosa inter spinas, Arbor vitæ in Golgatha, Columba in foraminibus petræ — Mel a Leone — ramus olivæ — e. q. rel. Neque usitatus esse folet vitium, quam de Spirituali cœcitate, elephantiasi, apoplexia, morte disfere-

serere, & allegoricis ludere verbis ac mysticis locutionibus e.c. de mysterio conceptionis Jesu, regenerationis analogia cum naturali gignendi negotio, connubiali Christi cuius filiis vinculo; in quibus omnibus nugis quid otiosum ac ineptum, nec non scandali plenum sit, nemo non videt. Fallo etiam prætenditur, Biblicas phrases ac similitudines propter emphaticam suam adhibendas esse; atqui prudentem usum earundem, instar luminum orationis, concedimus; ineptum jure dannamus. 3) *Brevis* sit propositio, ne memoria excidat auditorum, qui per totam orationem thema ejusdem ante oculos habere debent; sed ex altera quoque parte *adæquata* sit. Alias valet illud Hor. "brevis esse labore, obscurus fio;" Sic ergo apud EKMAN themata: citote parati — christum recipe — Jesus rex cordis — Pius Simeon cæt. minime adæquata continent sententiam; Melius enim in hunc modum circumscriberentur: Vita Christianorum utpote constans præparatio futuri status; officia Christianorum ad recipiendam & sectandam doctrinam Christi; Imperium Jesu morale (spirituale) ad hominum tendens emendationem; Incitamenta pietatis ab exemplis piorum derivanda; quid valent exempla piorum e. s. p. 4) Cum *textu Sacro conspirare* debet thema & inde derivari, sed absque violenta, abstrusa & exegetica demonstratione. Qui em-

emphasēs ex minutulis verbis querunt, atque mysteria in tropis quibuscumque venantur, latissimum quidem inveniunt sibi peragrandum campum, sed longe a consilio orationis vagantur. Exempla sunt: En cœlum apertum — fidelium peregrinatio ad Emauntem — populus lucem habens sed in tenebris ambulans — quasi tristes — sursum corda — Cave recidivam. Talia emblemata talesque ænigmaticæ sententiae ex Scriptura Sacra non sunt concionibus intrudendæ. Interim tamen aliquamdiu convenit, questionem quandam aut sententiam, in textu obviam, thematis loco proponere; e. c. Pietas ad omnia utilis — Dulce est Deo confidere — Quicquid ex fide non provenit peccatum est. cfr. FANT ad BASTH. *Predikofâte*. 5) *Conpiosum* thema esto oratori, ne propter penuriam & defectum materiæ resiliat ad inanies ac peregrinas res, v. c. in themate: habenti dabitur — quid vobis videtur de Christo, & simil. Verbosa tamen propositio, optimis interdum Oratoribus enata, æque fungienda est, utpote re ipsa & difficilis & otiosa: e. c. Consilium Dei ab æterno constitutum, diutius hominibus arcanum, per prophetas prædictum, tandem vero per Christum manifestatum. Diffusa ejusmodi & late extensa propositio, immensum suppeditat hiatus in oratione, adeoque vitanda. 6) *Aptitudo* demum, & quoad simplicitatem stili & audi-

auditorum sive loci habitum, insit themati non minus quam orationi universae; sunt enim gradus in ipsa simplicitate, quam insignem ornatus virtutem salutant Rethores. Rudioribus quoque non eadem plana sunt, quæ politioribus cultisque.

§. 5. *Divisionem* thematis, recentiori demum ævo excogitatam, ad omnes orationes non esse extendendam, facile agnoscimus; Propositione enim simplex, licet per diversa debeat tractari momenta, nulla tamen eget divisione. Composita autem melius fortassis & ad auditorum usum accommodatius per divisas suas exponitur partes, quare etiam morem hunc dividendi vulgo receperunt nostrates eo consilio, ut explicatius atque distinctius doctrina christiana mentibus instillari possit. Duplicem vero pro argumenti indole & oratoris libertate, sive per diversas sententias aut enuntiata, (momenta), sive per juste formatas sectiones partesque observandum præscripserunt modum. Et quidem in *illo* genere plus libertatis, quam in *loc*, locum obtinet, siquidem sententiæ possunt pro lubitu & tempore aut coacervari aut omitti; membra autem dividenda nec certum excedere modum, neque minui debent. In ipli *Sententiis*, post propositionem mox proferendis, observamus: 1) easdem cum universa materie & textu connectendas esse. In analyticâ quippe methodo optimum est, e tex-

textu ipso elicere precepta sive practicas obseruationes, easdemque uno velut intuitu auditoribus sistere, e. c. die transformationis Christi, ad textum Math. 17: 1 — Thema: *gloriosa Christi apparitio, discipulis suis benefica.* Hinc sequentes sententias e textu elicere juvabit: "Christum vere apparuisse; majestatis suae indicium fuisse quod cum Moise & Elia versaretur, siquidem eos velut provocare valuit; Divinæ providentiae specimen hoc fuisse; quia mirabili modo Deus declaravit Christum esse filium suum; Discipuli hæc audientes admirabantur." Sic concatenata & applicata historia hæcce commode proponi potest auditoribus. Historici tamen textus, qui simplices sunt & unum tantum habent scopum primarium, raro hoc egent artificio. In primis autem Syntheticæ conceptionis thema bene hoc modo, aut per gradationem quandam, aut inductionem ratiocinarum proponitur, e. c. Thema: *Salutis humanae idea.* Confectaria: "Felicitas quædam est in uero rerum sensualium modo —, melior in tranquillitate mentis —, longe major in sensu Divini amoris & favoris —; summa salus in familiari Dei confortio —; longe maxima in beata vita, quam speramus" Gradatio vero & concatenatio argumentorum memorie fortius mandatur, quam si ratiociniis utamur abstractis. Neque tamen induc̄tio ratiocinarum, logico ordine ex-

exhibita, a scopo oratoris aberrabit. Hinc SAURINO, TILLOTSONIO & MOSHEMIO multisque recent. in deliciis habita lait utraque methodus. 2) Easdem supra modum non esse congerendas, nec exquisitius & ad teilheticam omnem formam elaborandas, itidem patet. Qui enim multa proferunt momenta l. argumenta, mentem auditorum plus perturbant, quam insituunt.

Ad *Partitionem thematis* quod attinet, sit ea 1) *adæquata*. Partes debent exhaustire rem propositam adeo, ut nec plus dicatur, nec minus; e. c. si subj. ctum & prædicatum in themate adest: *Pietatis veræ summa utilitas* —; *Pietas vera* primum definiatur, dein ejus *utilitas*. Quod si vero adderetur: *impedimentum pietatis*, plus diceretur, quam thema ipsum involvit. 2) Membra dividenda debent se invicem excludere. Male itaque ageret, qui mortem Jesu hominibus ad omnem misericordiam tollendam, summe necessariam ac salutarem ita proponeret, ut primo statueret eandem tollere misericordiam, secundo, eam esse salutarem; Salutaris enim est eo, quod tollat reatum peccati & misericordiam. Simile vitium est in divisione thematis: *pietas ad omnia utilis*; 1) in dolore quovis 2) in morbis & egitate 3) in ceteris omnibus. conf. BASTHOLM cit. l. 5) *varietas & brevitas* observanda est una cum *simplicitate*; minime ergo opus est, subj. ctum & prædicatum

tum seorsim semper exponere. Tropicis autem uti locutionibus, quamvis e Scriptura petitis, æque inconsultum est in hoc genere, ac si quis fortis displiceret inter hæredes per ænigmata, aut flores venderet pro ediliis.

De subdivisionibus partium singularum idem valet quod de divisione argumenti; Sint scilicet *exactæ, simplices, temperatæ ac aptæ*. Neque sigillatim debent ante tractationem ipsam recenserri, quia molestia & remora non potest non attentioni hoc modo creari.

CAP. IX.

*De Traditione argumenti.*1) *Genere demonstrativo s. didacticō.*

§. 1. *Officium Oratoris Sacri* primum esse, ut doceat atque instituat mentem auditorum, ita ut vera persuasio inde oriri poslit, antea significavimus. Neque hic loci exponere amplius opus est, qua de materie, universo scilicet complexu doctrinæ Christianæ, quatenus & veritates de Deo ac Christo, & salutis œconomiam morumque Christianorum theoriā contineat, verba facere debeat. conf. Cap. 3. Jam vero de modo tractationis & de-